

ALLAH NI NANI?

Ukadiriaji:

Maelezo: Je, Waislamu wanaabudu Mungu sawa na Wayahudi na Wakristo? Nini maana ya neno Allah? Je, Mwenyezi Mungu ndiye Mwezi-mungu?

Aina: [Makala Imani za Uislamu Kuhusu Mwenyezi Mungu](#)

Na: Abdurrahman Robert Squires (edited by IslamReligion.com)

Iliyochapishwa mnamo: 03 Dec 2021

Ilirekebishwa mara ya mwisho mnamo: 18 Nov 2021

Baadhi ya dhana potofu kubwa zaidi ambazo wengi wasio Waislamu wanazo kuhusu Uislamu zinahusiana na neno "Allah." Kwa sababu mbalimbali, watu wengi wameamini kwamba Waislamu wanaabudu Mungu tofauti na Wakristo na Wayahudi. Huu ni uongo kabisa, kwani "Allah" ni neno la Kiarabu la "Mungu" – na kuna Mungu Mmoja tu. Kusiwe na shaka - Waislamu wanamwabudu Mungu wa Nuhu, Ibrahimu, Musa,



Daudi na Yesu - amani iwe juu yao wote. Hata hivyo, hakika ni kweli kwamba Wayahudi, Wakristo na Waislamu wote wana dhana tofauti za Mwenyezi Mungu. Kwa mfano, Waislamu - kama Wayahudi - wanakataa imani ya Kikristo ya Utatu na Umwilisho wa Kimungu. Hii, hata hivyo, haimaanishi kwamba kila moja ya dini hizi tatu inaabudu Mungu tofauti - kwa sababu, kama tulivyokwisha sema, kuna Mungu Mmoja tu wa Kweli. Dini ya Kiyahudi, Ukristo na Uislamu zote zinadai kuwa "Imani za Kiibrahimu", na zote pia zimeainishwa kuwa "zinazoamini Mungu mmoja." Hata hivyo, Uislamu unafundisha kwamba dini nyingine, kwa namna moja au nyingine, zimepotosha na kubatilisha imani safi na sahihi juu ya Mwenyezi Mungu kwa kupuuza mafundisho yake ya kweli na kuyachanganya na mawazo ya mwanadamu.

Kwanza kabisa, ni muhimu kutambua kwamba "Allah" ni neno lile lile ambalo Wakristo wanaozungumza Kiarabu na Wayahudi wanalitumia kwa ajili ya Mungu. Ukichukua Biblia ya Kiarabu, utaona neno "Allah" likitumiwa ambapo "Mungu" limetumiwa katika Kiingereza. Hii ni kwa sababu "Allah" ni neno katika lugha ya Kiarabu sawa na neno la Kiingereza "God" lenye herufi kubwa "G". Zaidi ya hayo, neno "Allah" haliwezi kufanywa kwa wingi, jambo ambalo linaendana na dhana ya Kiislamu ya Mungu.

Inapendeza kuona kwamba neno la Kiaramu "El", ambalo ni neno la Mungu katika lugha ambayo Yesu alizungumza, kwa hakika linafanana zaidi katika sauti na neno "Allah" kuliko neno la Kiingereza "God." Hili pia ni kweli kwa maneno mbalimbali ya Kiebrania ya Mungu, ambayo ni "El" na "Elah", na namna ya wingi au iliyotukuzwa "Elohim." Sababu ya kufanana huku ni kwamba Kiaramu, Kiebrania na Kiarabu zote ni lugha za Kisemiti zenye asili moja. Ikumbukwe pia kwamba katika kutafsiri Biblia katika

Kiingereza, neno la Kiebrania “El” limetafsiriwa kwa njia mbalimbali kama “Mungu”, “mungu” na “malaika”! Lugha hii isiyo sahihi huruhusu watafsiri tofauti, kulingana na mawazo yao ya awali, kutafsiri neno ili kupatana na maoni yao wenyewe. Neno la Kiarabu “Allah” halionyeshi ugumu au utata kama huo, kwa kuwa linatumika tu kwa ajili ya Mwenyezi Mungu pekee yake. Kuongezea, katika Kiingereza, tofauti pekee kati ya “god”, ikimaanisha mungu wa uongo, na “Mungu”, ikimaanisha Mungu Mmoja wa Kweli, ni herufi kubwa “G”. Kwa mambo ya ukweli yaliyotajwa hapo juu, tafsiri sahihi zaidi ya neno “Allah” katika Kiingereza inaweza kuwa “Mungu Mmoja-na-Pekee” au “Mungu Mmoja wa Kweli.”

Muhimu zaidi, ifahamike pia kwamba neno la Kiarabu “Allah” lina ujumbe mzito wa kidini kutokana na maana yake ya msingi na asili yake. Hii ni kwa sababu inatokana na kitenzi cha Kiarabu ta’allah (au alaha), ambacho kinamaanisha “kuabudiwa.” Hivyo katika Kiarabu, neno “Allah” linamaanisha “Anayestahiki kuabudiwa.” Hii, kwa ufupi, ni ujumbe Safi wa Mungu Mmoja wa Uislamu.

Inatosha kusema kwamba kwa sababu tu mtu anadai kuwa Myahudi “mwenye imani ya Mungu mmoja”, Mkristo au Muislamu, hiyo haiwazui kutumbukia katika imani potovu na matendo ya kuabudu masanamu. Watu wengi, ikiwemo baadhi ya Waislamu, wanadai wanaamini katika “Mungu Mmoja” ingawa wameanguka katika matendo ya ibada ya sanamu. Kwa hakika, Waprotestanti wengi huwashutumu Wakatoliki wa Kirumi kwa mazoea ya kuabudu sanamu kuhusiana na watakatifu na Bikira Maria. Vivyo hivyo, Kanisa la Othodoksi la Ugiriki huonwa kuwa “waabudu sanamu” na Wakristo wengine wengi kwa sababu katika sehemu kubwa ya ibada yao hutumia sanamu. Hata hivyo, ukimuuliza Mkatoliki wa Kiroma au Mshiriki wa Othodoksi ya Ugiriki ikiwa Mungu ni “Mmoja,” siku zote watakujiibu: “Ndiyo!” Imani hii, hata hivyo, haiwazui kuwa “waabudu wa viumbe” waabudu sanamu. Vivyo hivyo kwa Wahindu, ambao huchukulia tu miungu yao kuwa “madhihirisho” au “mwili” wa Mungu Mmoja Mkuu.

Kabla ya kuhitimisha... kuna baadhi ya watu huko nje, ambao kwa hakika hawako upande wa ukweli, ambao wanataka kuwafanya watu waamini kwamba “Allah” ni “mungu” fulani wa Kiarabu^[1], na kwamba Uislamu ni “mwingine” kabisa. - ikimaanisha kwamba haina mizizi ya kawaida na dini nyingine za Ibrahim (yaani Ukristo na Uyahudi). Kusema kwamba Waislamu wanaabudu “Mungu” tofauti kwa sababu wanasema “Allah” ni jambo lisilo na mantiki sawa na kusema kwamba Wafaransa wanaabudu Mungu mwingine kwa sababu wanatumia neno “Dieu”, kwamba watu wanaozungumza Kihispania wanaabudu Mungu tofauti kwa sababu wanasema “Dios” au kwamba Wayahudi wanaabudu Mungu tofauti kwa sababu nyakati fulani wanamwita “Yahweh.” Hakika, hoja kama hii ni ujinga kabisa! Inapaswa pia kutajwa, kwamba kudai kwamba lugha yoyote inatumia neno sahihi pekee la Mungu ni sawa na kukana umoja wa ujumbe wa Mungu kwa wanadamu, ambao ulikuwa kwa mataifa yote, makabila na watu kupitia manabii mbalimbali waliozungumza lugha mbalimbali.

Tungependa kuwauliza wasomaji wetu kuhusu nia za watu hawa? Sababu ni kwamba Ukweli wa Mwisho wa Uislamu umesimama juu ya msingi thabiti na imani yake isiyotikisika katika Umoja wa Mungu usio na lawama. Kutokana na hili, Wakristo hawawezi kukosoa mafundisho yake moja kwa moja, lakini badala yake hutunga

mambo kuhusu Uislamu ambayo si ya kweli ili watu wapoteze hamu ya kujifunza zaidi. Kama Uislamu ungewasilishwa kwa njia ifaayo kwa ulimwengu, kwa hakika ungeweza kuwafanya watu wengi kufikiria upya na kutathmini upya imani zao wenyewe. Inaonesha kwamba wanapogundua kwamba kuna dini ya ulimwengu mzima inayofundisha watu kumwabudu na kumpenda Mungu, huku pia wakifuata Imani Safi ya Mungu Mmoja, angalau wangehisi kwamba wanapaswa kuchunguza tena msingi wa imani yao na mafundisho.

Vielezi-chini:

[1]

Kama vile dai lililo enezwa na Robert Morey katika kazi yake, *Mwezi-mungu Allaah katika Mambo ya Akiolojia ya Mashariki ya Kati*. Kwa majadiliano ya kazi hii, tafadhali tazama viungo vifuatavyo: (<http://www.islamic-awareness.org/Quran/Sources/Allah/moongod.html>)

Anwani ya wavuti ya makala hii:

<https://webcache001.islamreligion.com/sw/articles/195/allah-ni-nani>

Hakimiliki © 2006-2020 Haki zote zimehifadhiwa. © 2006 - 2026 IslamReligion.com. Haki zote zimehifadhiwa.